



KABINET GEZAGHEBBER

Aan: Frakshon Coffie
t.a.v. Mw. D. Coffie

Uw brief: ER-2021000183
Ons nummer: GZ/2021000133
Datum: 26 maart 2021
Betreft: Reactie op brief Frakshon Coffie

Apresiablel señora Coffie,

Danki pa e karta ku Sra. Coffie a manda tokante e medidanan den e brote aktual di Covid 19. Mi ta elaborá aki bou riba e puntonan ku Sra. Coffie a trese dilanti den su karta.

Sra. Coffie ta puntra dikon no ta bini un lockdown total kaminda tur hende mester keda kas i no tin mag di subi kaya. Mi por kontestá Sra. Coffie lo siguiente riba esei. Mi no ta bisa ku nunca nos lo no tuma e medidanan akí, pero mi ta bisa sí ku ku mi tin di tene cuenta ku mas faktor den mi eskoho ku solamente e kontagionan di Covid. E situashon aktual ta pone nos dilanti dilemanan kaminda kada eskoho tin su víktimanan. E kos di mas importante ta: e medidanan mester ta proporshonal; nan no mester bai mas leu ku ta nesario pa logra e meta. Nos ta tumando ya kaba medidanan ku ta drástiko i nos sa ku un lockdown ful tin un preis muchu mas haltu. Mi ta menshoná komo ehèmpel e loke nan ta mèldu na e lugánan pa mèldu violensia doméstiko i maltrato di mucha. E kasonan ku ta dreña aya ta masha serio, kaminda a usa violensia brutu. Probablemente esaki ta debí na e situashon sin salida ku hende ta bibando aden un aña kaba. Esaki lo empeorá si hendenan no tin mag di sali di nan kas mas. Awor ku tampoko e muchanan no por bai akohida pa mucha òf skol mas, tin mucha ku lo haña nan mes den un situashon doloroso. E empresarionan ta un otro ehèmpel : hopi di nan ta kasi bai fayit. Hende mester por kome tambe. Mi mester tene cuenta tambe ku e tipo di problemanan ei, pasobra riba término largu nan tin konsekuensia tambe i mi ta sinti mi responsabel pa esei tambe. Den tur e konsiderashonnan akí ta trata salú i bienestar di hende. Un biaha mas, kisas nos ta tuma e medidanan akí, pero esei mester ta a base di konsiderashon bálido. Si esei ta nesario, lo mi hasi esei sigur.

Sra. Coffie ta puntra dikon alumnonan ku mester pasa èksamen tin mag di bai skol ainda. Alumnonan ku mester pasa èksamen tin mag di bini skol solamente si ta asina ku ta tene estriktamente na e medidanan. Pa nan preparashon pa èksamen final tin biaha ta nesario pa nan t'ei, pa nan por hasi nan èksamen bon. Esaki ta importante pa futuro di e muchanan. Mi ta konfia ku e skolnan ta organisá esei di un forma responsabel, e skolnan ta bashí, ke men tin bastante espasio pa esei. Un gran parti di e dosentenan a bakuná fin di siman pasá, ke men di e forma ei tambe nos ta purba pa redusí e riesgonan na skolnan.

Sra. Coffie ta puntra kon bin e playanan ta habrí ainda. Si Sra. Coffie ta ku Sra. Coffie su famia na playa, no tin peliger den esei. Pero sí na momento ku hende palabrá ku otro pa topa. E medidanan ta dirigí pa hende di diferente kas di famia wak i topa otro lo ménos posibel. Si hende tene nan mes na esei, no ta un problema pa ta na playa, ta hustamente saludabel, pasó e ta relahante i hende ta pafó.

Sra. Coffie ta puntra dikun restoran di hotèl tin mag di ta habrí ainda. Ta konsiderá restoran di hotèl komo sala di e wéspetnan. No ta tur ora tin e posibilidat pa kushiná den kamber di hotèl òf pa sinta kome na mesa. Naturalmente e restorantnan mester kumpli sí ku dunamentu di lugá fiho pa sinta, espasio entre e mesanan, ora di sera 20:00 or i un prohibishon pa bende alkohòl. E hotèlnan mester sòru tambe pa personal por mantené 1,5 meter di distansia durante trabou.

Sra. Coffie ta puntra dikun no tin lei seku general. No ta alkohòl ta e problema, e problema ta enkuentronan ku alkohòl. E regla ku hende no tin mag di bishita otro, en kombinashon ku e toke di keda, i e prohibishon di alkohòl riba kaya, lo mester ta suficiente pa limitá e enkuentronan ei. Un lei seku general lo krea problema nobo atrobe, manera negoshi ilegal i problema pa hende ku no por sin alkohòl.

Sra. Coffie ta puntra pakiko algun pakus ku no ta esensial ta habrí i kon por ta ku tin demasiado hende trahando
Negoshi ku no ta esensial, no tin mag di ta habrí. Direktorado di Supervishon i Mantenshon ta kontrolá esei. Nos tin e impreshon ku negoshi ku tin mag di ta habrí ta laga tur nan personal bin traha awor tambe. Esaki sigur no ta e intenshon. Komo gobièrnu nos lo aktua kontra esaki tambe.

Sra. Coffie ta puntra si mester tin asina tantu hende riba kaya pa praktiká deporte individual. A skohe pa esei, ya ku praktiká deporte i aire liber ta bon pa relahamentu i pa sistema inmunológiko. Nos ta vigilá si hende ta kumpli pa esaki sosodé individualmente.

Sra. Coffie ta puntra si nos no mester sera aeropuerto. E problema di e kontagionan ta pa gran parti bou di poblashon lokal. Lo sosodé de bes en kuando ku hende di afó ta bini ku e vírus, pero no ta esei ta e problema awor. Si nos sera aeropuerto esei sí ta krea un problema, komo ku por ehèmpel nos mester di hopi personal ku ta bini pa sostené nos for di Hulanda i Kòrsou i habitante di Boneiru mester por bin bèk. E echo ku Boneiru i Kòrsou ta den lockdown ta pone ku kada biaha tin ménos hende ta biaha. Tantu for di Hulanda komo for di Kòrsou tin ménos buelo, ku ménos hende.

Sra. Coffie ta puntra pakiko no ta manda Karel Doorman. Awor aki ainda tin bastante kapasidat di kuido den region. Ta asina sí ku ta personal tabata un problema, ta rekrutando personal hunto ku Hulanda ku urgensia. E kolumna blanku ta kontinuamente den kombersashon ku nos, VWS i ku e otro islanan.

Riba Sra. Coffie su pregunta si lo no mester rekompensá personal den kuido, mi por kontestá Sra. Coffie lo siguiente:

Nos no ta konosí ku e kondishonnan laboral di personal nobo ku a rekrutá den sektor di kuido kurativo. Nos ta kontentu sí ku nos por haña mas personal. Kolegio Ehekutivo no ta e órganu apropiá pa realisá un rekompensa èkstra pa personal di kuido lokal. Nos ta masha kontentu sí ku nan dedikashon grandi i balioso.

Sra. Coffie ta puntra si nos mester tin un epidemiólogo fiho na e isla. Awor aki nos ta bon ekipá ku un okupashon kontinuo di un epidemiólogo òf un dòkter di infekshon. Tin tambe vários biaha pa siman sinkronisashon ku RIVM tokante e situashon akí.

Un biaha mas, ku tur e medidanan ku ta tuma, ta tene na konsiderashon si esakinan ta proporshonal, ki impakto esakinan tin pa redusí e kontagionan i ki impakto nan tin riba otro aspekto di bida di hende. Mi ta hasi esaki a base di konseho di EBT, kaminda konseho di e kolumna blanku tin mas peso.



Atentamente,

Gezaghebber

Edison Rijna

A handwritten signature in black ink, appearing to be 'Edison Rijna', written over the printed name. The signature is stylized with a large loop at the top and a long horizontal stroke extending to the right.